

# L'entira direcziun da l'auto da posta sto prender la chapella

Betg mo rapports, mabain era diras consequenzas han ins publitgà ier

DA CLAUDIA CADRUVI / ANR

■ **Dus rapports èn uss sin maisa e mussan co che l'interpresa d'autos da posta ha manipulà sistematicain sia contabilitad. La finamira è stada: zuppentar gudogns per incassar dapli subvenziuns da la confederaziun, dals chantuns ed il davos dals quints dal pajataglia.** «Jau sun schoccà cun tge energia ch'ins ha manipulà la contabilitad», ha ditg il president dal cussegl d'administraziun *Urs Schwaller* ier a las medias. «Starmentus è che tuts mecanissem da controlla han onns ora disdi.» Ins haja evidentamain pers il sentiment per quai che saja duavel. «Per quai ch'è capità qua

sur onns na datti nagina giustificaziun», uschia Schwaller. Ins haja rut a moda inacceptabla la confidenza.

## La direcziun sto ir

La scheffa da La Posta *Susanne Ruoff* ha già dà la dumengia sia demissiun. Ma l'entira direcziun da l'auto da posta stoppia prender la chapella, ha ditg Schwaller. Plinavant dovri midadas er en la direcziun dal concern da Posta. Ils bonis – numnads pajaments variabels – vegnan pajads ora pir cura che tutas examinaziuns èn terminadas. Ad interim daventa *Ulrich Hurni* schef da La Posta.

Plinavant vegn schliada si la holding «Impresa» che ha pussibilità en l'inter-

## Zuppentà gudogns da passa 30 milliuns en il Grischun

Entaifer il 2007 ed il 2015 ha l'interpresa d'auto da posta spustà – ins pudess era dir zuppentà – gudogns da radund 90 milliuns francs. Il rapport Kellerhals-Carrard descriva manidlamain cun tge trics contabilistics che quai è succedi e tgi ch'è stà involvi. Sin pagina 143 publitgescha il rapport ina tabella dals gudogns transferids dad ina sparta en l'autra. En il Grischun èn vegnids transferids suandants gudogns: radund trais milliuns francs il 2007, var 1,4 milliuns il 2008, 2,6 milliuns il 2009, 2,7 milliuns il 2010, 4,4 milliuns il 2011, tschintg milliuns il 2012, 4,6 milliuns il 2013, 3,1 milliuns il 2014 e 3,2 milliuns il 2015. En tut sa tracti da gudogns da passa 30 milliuns ch'èn flessegiads da la sparta «traffich da persunas regional» en autras

spartas da la contabilitad. Uschia han ins fatg finta da betg cuntanscher tants gudogns cun il transport da persunas per survegnir dapli subvenziuns dal chantun e da la confederaziun. Las subvenziuns ch'ins ha recaltgà enpli entras las cugliunarias contabilistics paja La Posta enavos, sco quai che Schwaller ha ditg ier.

Cun ils passa 30 milliuns è il Grischun la regiun cun – per lunsch or – ils pli auts transferiments da gudogns. Il Tessin stat sin il segund plaz cun transferiments da total 13,8 milliuns francs. Suenter vegn l'Argovia cun 10,5 milliuns. Tant il rapport Kellerhals-Carrard sco era l'expertisa Donatsch-Bachmann-Uhlmann èn publics ed accessibels en l'internet, uschia che mintgin che vul sa prender invista.



**Cussegliera federala Doris Leuthard (amez), il schef da l'administraziun da finanzas Serge Gaillard (a san.) ed il secretari general dal departament Toni Eder han orientà las medias.**

KEYSTONE

presa d'auto da posta ils transferiments da gudogns. Il 2019 vul ins era midar la firma da revisiun. Il cussegl d'administraziun ha enpli gist sez proponi ch'el na dumondia per il mument nagina desarcha per il 2017 areguard las fatschentas contestadas.

## Transparenza e process giudizials

«A vess jau stuì tschentar dumondas? Per mia tenuta ch'è stada or da vista dad oz memia pauc critica stun jau botta», ha

ditg Schwaller. I dovria ina nova entschatta ed ins stoppia introducir ina cultura averta e sincera en il concern da Posta.

Schwaller ha fatg attent ch'i marscha duas examinaziuns penals administrativas e ch'i dettia forsa anc plants da responsabladad e d'indemnisaziun. Ils dus rapports che La Posta ha publitgà ier duain stgaffir trasparenza e metter sin maisa tge ch'ins sappia fin uss. Schwaller ha dentant era punctuà ch'ils pertutgads n'hajan fin oz anc betg pudì prender po-

siziun e che numns da pliras persunas sajan perquai anonimidsas.

## Damain paja per il cader

Er il cussegl federal reagescha e pretenda da scursanir las pajas da cader tar interpresas federalas. Ils traffitgims da l'auto da posta sajan nunperdunabels, ha ditg *Doris Leuthard* ier suentermezdi a las medias. L'affera haja fatg donn a la reputaziun da La Posta e sutmineschia la confidenza en il service public.